

BOTA BERTSOA!

**ARGIA**

ANDER ELORTEGI

DOINUA: DURANGOTIK GORAKO

1

Zeru iluna eta
zorua umela,
indarra faltan eta
aurpegi goibela.
Kopetilun bazaude,
haserre bestela,
jakin zerua beti
argituko dela.



2

Behegaina bezala
begiak bustiak.
Bat-batean putzuan
jo du eguzkiak.
Argia islatzen du
uretan izpiak
eta atera ditu
kolore guztiak.



3

Gorri, laranja, hori,
berde, urdin, more
ostadarra zeruan
irten da dotore.
Zeru, itsaso, ibai
belar eta lore
bizitzak behar ditu
pila bat kolore.




BOTA BERTSOA!



4

Argazki-kamera bat
da gure begia
garuna erretratu
ho(r)ien biltegia.
Diferente argituz
iruditegia
zein desberdin ikusten
dugun materia.



5

Kapela jantzi eta
magoek bezala
fokuak ikusleak
harritu ditzala.
Argi-izpiak eta
atzeko itzala,
argiaren magiak
harrapa gaitzala.

